



GENERAL (/GENERAL)

## Boling UMP-Media platform terbaik erat hubungan baik

31 July 2018 / 0 Comments (/general/boling-ump-media-platform-terbaik-erat-hubungan-baik/#comments)

Kuantan, 30 Julai- Seramai 150 orang hadir dalam program boling bersama Media anjuran Universiti Malaysia Pahang dengan kerjasama Kelab Media Pahang yang berlangsung di Lpayground 6 Semambu Kuantan hari ini. Hadir memeriahkan program Naib Canselor UMP, Prof. Dato Sri Dr Daing Nasir Ibrahim, Presiden Kelab Media Pahang, Dato Nik Naizi Hussin, Timbalan Naib Canselor (Hal Ehwal Pelajar dan Alumni), Dato Dr Yusserie Zainuddin, Ketua Pegawai Operasi/Pendaftar UMP, Abd. Hamid Majid dan Pengarah Pusat Sukan dan Kebudayaan, Abd. Rahman Hj. Safie.

Menurut Dato Dr Daing Nasir, program ini dapat merapatkan hubungan baik dengan pengamal media dalam program santai selain beriadah dalam menyokong gaya hidup sihat yang giat dijalankan di universiti ini.

"UMP amat menghargai golongan media yang banyak membuat liputan setiap aktiviti yang dijalankan termasuklah pencapaian dalam penyelidikan dan kecemerlangan warganya. Program pada malam ini adalah untuk bertemu dan mengeratkan lagi hubungan sesama kita selain dapat bertanya khabar. Selain itu, saya juga sentiasa mencari ruang untuk menganjurkan aktiviti-aktiviti yang boleh mendekatkan pengurusan universiti dengan warga media," katanya.

Tambah beliau, dengan publisiti dan liputan meluas yang telah diberikan oleh pihak media selama tempoh tersebut, masyarakat awam kini telah mengenali UMP dan berbesar hati mendapat kerjasama yang tidak berbelah bagi daripada pihak agensi media.

Dalam pada itu, beliau berkongsi kejayaan UMP yang telah menerima pengiktirafan antarabangsa dengan pencapaian penarafan lima bintang keseluruhan terbaik tahun ini berdasarkan Sistem Penilaian Quacquarelli Symonds (QS) Stars Rating 2018 yang dijalankan pihak QS Intelligence Unit iaitu sebuah organisasi pengauditan universiti melalui QS World Ranking yang berpusat di London. Tambahnya, lebih membanggakan pencapaian lima bintang ini menjadikan UMP satu-satunya universiti teknikal di Malaysia yang mengungguli pencapaian cemerlang di negara ini bersama lima universiti penyelidikan (RU) iaitu

Universiti Malaya (UM), Universiti Kebangsaan Malaysia (UKM), Universiti Putra Malaysia (UPM), Universiti Sains Malaysia (USM), Universiti Teknologi Malaysia (UTM) serta sebuah universiti swasta, Universiti Teknologi Petronas (UTP).

UMP cemerlang lima bintang dalam kategori pengajaran, kebolehpasaran pekerjaan (GE), pengantarabangsaan, kemudahan (fasiliti), inovasi dan inklusif (kerangkuman) hasil budaya kerja cemerlang seluruh warga universiti. Bagi kategori penyelidikan, universiti ini juga berjaya memperolehi 4 bintang serta mendapat 3 bintang bagi penilaian terhadap kategori Kekuatan Program. QS Stars adalah sistem penarafan yang memberikan pandangan terperinci mengenai institusi dan universiti bagi membolehkan pelajar serta ibu bapa mengenal pasti institusi pendidikan yang terbaik.

Turut berlangsung pra pelancaran maskot Kejohanan Sukan Antara Staf Universiti Malaysia (SUKUM) Kali ke-43 yang bakal menyaksikan lebih 2000 atlit dan pegawai sukan berkampung di universiti ini mulai 10 hingga 18 Ogos 2018 dan acara perasmian akan disempurnakan oleh Menteri Pendidikan Malaysia, YB Dr. Maszlee Malik pada jam 8.00 malam di Kompleks Sukan UMP. Kejohanan kali ini bakal mempertaruhkan lebih 300 pingat dengan 17 acara sukan yang dipertandingkan antaranya bola sepak, bola jaring, tenis, olahraga, basikal, boling, badminton dan lain-lain lagi.

Menjelangnya Sambutan Bulan Kemerdekaan mulai 4 Ogos hingga 16 September nanti dengan bertemakan Sayangi Malaysiaku, UMP akan mengadakan beberapa acara seperti Kempen Kibar Jalur Gemilang, Pertandingan Fotografi dan Video Lensa Bakti, Bicara Cendekia, Forum Aspirasi Merdeka, Merdeka Walk dan Pameran di Perpustakaan UMP. Orang ramai juga dijemput untuk sama-sama mengambil bahagian dalam acara sepanjang Bulan Kemerdekaan dan Hari Malaysia nanti. Lebih 15 agensi media hadir memeriahkan program boling pada kali ini termasuklah Ketua Biro NSTP, Abd. Razak Raaf, Utusan Malaysia, Mohd. Shahriza Abdullah, Bernama, Nor Shamsiah Mohamed dan Sinar Harian, Nik Nor Amirul Mu'min.